

馮氏錦囊秘錄痘疹全集卷七

起脹門

男 乾元龍田

海鹽馮兆張楚瞻甫纂輯

門人王崇志慎初仝校

男 乾吉佑民

起脹諸論

夫痘子起發不可拘以日數。瘡出以漸其發亦以漸。謂之適中。若一齊湧出。即皮肉虛腫。一齊炊發者。此表氣虛毒氣奔潰而出。表虛則不能收斂。必生癢痛潰爛矣。其治急宜救表為主。若已出盡當起不起。此裡氣虛毒氣留伏壅而不出。必增煩躁腹滿喘促矣。此又急宜救裡為要。然痘

疹發於肌肉。陽明胃經主之。脾氣一溫。胃氣時揚。決無陷伏之患。如庖人籠蒸之法。但欲其鬆耳。凡痘瘡起發之時。磊落分布者。乃表裡疏通。上下發泄。毒氣解散。爲順痘也。此顆粒叢聚。根窩堅硬。似瘤之紅。而不痛。似核之堅。而不動。似癰之腫。而不潰者。此氣血凝滯。而不流。肌肉敗壞。而不化。毒氣鬱積。而不解。爲逆痘也。不出四五日。必瘙癢悶亂而死。更有初出細密模糊。不成窠粒。至於起發。盡成大泡。清水虛癢者。此乃衛氣不斂。爲逆痘也。不出二三日。皮脫肉乾。悶亂而死。此皆惡毒之氣所致。須於出現起發之時候。之若到成膿。則無是病矣。

凡痘之出以氣血和平爲主。尖圓堅實者氣也。血活明潤者血也。紅活平陷者血至而氣不足也。圓實而色淡者氣至而血不足也。平塌灰白者氣血俱不足也。焮腫紅綻氣血俱有熱也。若痘至起發則欲透而磊落尖圓光壯肥澤者上也。如根脚橫開皮起水漲者次也。如頂皮不起根脚不開猶是先出之形。不見新生之水者此卽謂之起發不透。如氣本實者此必曾感風寒宜用發表。如氣本虛者此必不能飲食或兼吐利宜補中氣而兼托表。若時日已多發猶不透是以煩躁不安啼叫惡熱者此毒熱在裡宜急鬆肌表托而兼解散熱毒導引心火可也。若譫語而妄有

見聞時發狂叫者。此五臟熱毒蘊積。而陽氣獨盛。無陰氣以和之。必大便不利。宜微通之。使裡無留滯。而外得快利也。甚至昏不知人。腹脹喘呼者。不治。總之起發之時。不徐不疾。以漸長大。尖圓磊落。光壯堅實。根脚紅活。此氣充足。載血而行。透徹諸瘡。自然尖圓光壯。不須服藥。如雖紅活。頂平中陷。不成尖圓。色嫩皮薄。不能堅厚。其變爲癢塌。爲留伏壅遏。乃氣虛也。宜用補氣。若瘡皮薄色嬌。淫淫如濕者。此氣不勝血。宜補氣涼血。如浮囊虛起。殼中無水者。此氣不依血。血不附氣。其變爲癢塌。爲癰腫矣。宜十全大補湯。加減主之。凡由紅斑而水泡。水泡而膿泡。膿泡而結痂。

有自然之序者吉也。若顛倒失常，盡由氣血兩虛，邪火冲擊，變現爲害。及初起發瘡，頭便帶白漿者，不分何處，並非佳兆，不特口唇也。

三日四日痘出當齊，點至足心，勢方安定。若猶有陸續不出之狀，或隱隱於皮膚之內，不見不起者，非風寒壅遏之因，必內虛不振之故。是以四日以前痘毒方出身表，宜涼。四日以後，毒出已定，身表宜溫。涼則氣血和平，痘色必然潤澤溫則一裡開通，其毒易以成漿。至此而身若不溫，雖未必至於冰狀，而痘瘡斷難易長。又若身熱不退，或身痛不止，或因風寒迫迫，或因暑氣所併，而無二便秘塞煩喘。

之症者是症在表而不在裡。宜葛根透肌之藥以發之。待其表和而痘出自順。但不可過汗。以喪其津滋。至四五日際血泡已成。理當起脹。如果肥大而粗。根紅而頂光。色白者。已具行漿之勢。若還赤色。過頭雖兒嬌紅可愛。然延綿六日。必依然到頭空殼。虛花皮薄而光亮如燈。內含是水。頂尖而根脚不紅。行漿弗實。熱毒盛而不解。則爲紫。爲黑。雍而不起。則爲陷。爲塌。滯而不榮。則爲乾。爲枯。爲青。爲灰。怯而不振。則爲不快。或爲停漿。肉先腫脹而痘反不起。漿則滯而不行。面已虛浮而痘反退縮。毒則遏而不進。身不熱而痘不起。已成冰硬之形。赤色若還不變溫之。可興氣。

血弱而不振。遂成不快之狀。紅潤依然如舊。補之可生。紫色乾枯。只宜活血。鬆肌切忌溫中帶補。爲壅爲滯。烈藥雖然可發透肌。尤是良方。溘瀉惟宜溫補。爲先。久瀉佐以升提。爲要。此驗痘之經常。而用藥之大槩也。

論黑陷血陷紫陷白陷灰陷及氣血虛實寒熱

氣陽也。血陰也。痘之一症。非陽則不能以發其毒。非陰則不能以化其毒。故必得其陰陽交會。氣和血順。也有陽始會陰。氣至血附。根窠既立。而忽中陷者。此因元氣不足。而不能續其後來。是以陰血雖有附氣之功。而陽氣乃無制毒之力。以致陷而不滿。生生之道絕矣。其陷有五一曰黑

陷二曰血陷三曰紫陷四曰白陷五曰灰陷黑陷者爲初
出少稀後出加密陽會陰之次因陽氣弱而不能續其初
出之功血無氣養故枯萎而黑陷也血陷者血盛於氣氣
弱不能拘領其毒久則變而爲紫陷也紫陷者爲氣愈虛
而血無氣蓄則毒之盛負載不前是以血亦爲之離去也
白陷者爲氣不足其血亦弱久則變而爲灰陷也灰陷者
氣血衰敗而不榮也此等之陷一皆氣之虧損使然如折
奇花少頃生氣既絕則憔悴不榮矣故宜預爲早治凡見
形平場勢不起發摸不硬手兼或皮皺甚至頂陷其現症
而爲吐瀉不食語言不全此皆氣之虛也卽宜保元如痘

形飽滿。輪郭豐厚。其瘡堅硬。或發壯熱。或喘痰壅嗽。此氣之實也。治宜清肺和解。如鼻流清涕。咳嗽惡風。身體戰慄。自汗。瘡色慘白者。此氣之寒也。宜中和之。如鼻孔乾燥。皮毛枯槁。咳嗽痰血。或鼻出血。瘡色焦紫者。此氣之熱也。治宜瀉肺。如瘡不紅活。淡白發癢。不能冒漿。以手摸過。色卽轉白者。此血之虛也。如身熱不除。或寒熱往來。瘡色焦紫。口苦舌乾。唇青面赤。脇肚作痛者。此血之實也。如瘡色灰慘。血凝不活。面青筋縮。嘔吐清水。或瀉稀水。如清菜色者。此血之寒也。若瘡色昏黯發癢。眼珠紅赤。大便堅燥。身熱易怒。此血之熱也。虛者補之。熱者清之。寒者溫之。實者抑之。

之使氣血無過不及。但保元陽冲和之氣。自有蒸漿化毒之功。何慮五陷之患哉。

論痛

凡痘疹起發痛者。其症有數。一則毒邪欲出。氣血隨之。是以肌肉綳急而痛者。宜用活血散。一則皮厚肉密。又爲外寒相搏而痛者。宜用葛根湯。若熱甚毒者。宜用消毒散。若食雞魚酒物者。宜用清胃散。若發熱飲冷。大便秘結。而脾胃實熱者。宜四物連翹之類。若發熱飲冷。大便秘結。而脾胃實熱者。是可清胃潤燥。若發熱作渴。飲湯而屬脾胃虛熱者。又宜白朮散投之。六日已前多用發散。六日已後多用活血因。

乾滯而痛者。以水楊湯浴之。若屬時痛甚。治之不愈者。凶。然大抵身前痛者屬肺。身後痛者屬膀胱。身側痛者屬膽。四肢痛者屬胃。總宜急止。否則叫號傷氣。忍痛傷血。而多變症矣。故痘瘡不可過食毒物者。此耳。若至結靨乾硬而痛者。外宜塗酥以潤。內服清涼解毒可也。

起脹三朝順逆險

碎錦

順症勿治

凡報痘三日當逐漸起脹。先出先起。後出後起。痘胖一分。則毒出一分。痘胖已盡。則毒出亦完。根窠紅綻。頂肥碍手。面目漸腫。飲食二便如常。而無他症者。吉。此是氣盛血榮。

於內發揚於外毒已受制自當化毒成漿不治自愈一
凡痘瘡自初至結靨並宜痘內暗晦其外光潤所謂外陽
內陰少陰君火之象反此爲凶若內外皆光爲純陽無陰
治當補血內外皆暗爲純陰無陽治當補氣一凡痘瘡
之毒必氣以煦之血以濡之而後可得成熟也故於起發
之時光壯者氣有餘也肥澤者血有餘也氣血有餘表裡
俱和不須服藥一痘至起脹其痘頂必有小凹名爲痘
眼若根脚散大漿色淺白頂無痘眼者此爲水痘

險症當治

一痘雖起發乾枯無水謂之不肥澤帶着紫黯色謂之不

紅活其變爲黑陷乃血虛也宜內用四物加減外用胭脂

塗法一形長大而色枯燥者此氣至而血不榮也治宜

補血色紅潤而形平塌者此血至而氣不充也治宜補氣

形平塌色枯萎者此氣血俱不足也治宜大補氣血色灰

白者氣虛也紅紫起發者血熱也紅紫退縮者血滯也

一痘頂陷不起若年壽之上痘起者不必憂慮如年結上

亦不起者急與內托及痘當起脹而天庭印堂不起者亦

宜內托爲主否則漸變不治一痘雖紅鮮但乾燥而不

充肥者此火盛而血不足也治宜退火涼血爲主一痘

充肥而滯濕者此脾中有濕而氣不足也治宜去濕補氣

兼風藥以勝之、但不可太過太早、以損釀漿濕潤之氣、
一浮囊虛起、而殼中無甚漿水者、此氣不拘血、血不附氣、
必後發癰腫、甚則癢塌而死、宜參耆芎歸之類、加桂主之、
使氣血交會、方能化毒成漿、一有因諸獸驚嚇、而痘隨
伏色變者、是心失其主、而血不能歸附、氣不能充托耳、宜
用托裡之劑、內加人參遠志之類、一痘正脹之時、痘雖
起發、然皮薄不碍手、按之清水便出、而痘色不暗者、此爲
假脹、宜急參耆草姜桂之類、提氣貫膿、方可成就、否則
十一二日、必不能回漿結靨而死、一痘因觸以致痘陷、
如石曰硬者、則以芎歸殭蠶參耆姜桂之類主之、一痘

漸平塌、頭面漸腫者、治宜急用角刺、寒山甲、殭蠶之類透托爲主、否則散漫無拘、肉腫痘不腫矣。一痘紫陷不起、或痘黑如疔者、此血分大熱、急用丹皮、紅花、紫草、當歸、升麻、燒人尿之類、外則挑去惡血可也。一凡憂齒噤牙者、是腎氣旺而腎陰不足也、主痘陷伏、宜補陰而逐之。一痘當起發、如四圍起而中心平陷者、有二、有血化成水、四圍高起、但中心畧凹下者、俗呼爲茱萸痘、由中氣不足、發未透徹耳、治宜補托、有四圍沸起、中心落陷無水、猶是死肉、其形如錢者、此名鬼痘、急宜攻托、否則漸變黑點、不可爲矣。一起壯之時、光澤滋潤、勢如水光、而根下之紅、僅

有一線以火照之如琉璃燈樣者此爲虛起宜大溫補氣血托裡救表否則八九日間必發癰瘍而死 一痘瘡起發彼此相串皮腫肉浮或於本痘四傍旋出小痘攢聚漸胖成一塊者此痘最重宜內加消毒切守禁忌以防癰癢之變 一痘瘡起發中心突起四圍乾平無水者或裡紅外黑者此由皮膚閉密滯而不行痘毒鬱而不散耳治宜辛涼解肌外水楊湯浴之 一痘紅活充肥以指捺之隨破者此血有餘而氣不足也宜涼血補氣否則後必癰瘍 一痘久遇陰雨而不能起者治宜發表而兼燥濕 一痘因內傷飲食是以腹中飽悶或痛以致中氣鬱而不起